

續修陝西省通志稿

第四十一冊

卷七十一至七十三

續修陝西通志稿卷七十一

名宦八

補錄

廳州縣

羅鰲字巨川江西南城縣人中乾隆乙丑進士以即用知縣補興平旋調洵陽時洵邑義學自前令吳萬善創設後劉琪增樓舍三間規制未備鰲故圭峯後裔留心文教相度地勢改門於右以挹秀峯之爽顏曰敷文書院復增講堂學舍多間延名宿主講席其時從學者頗盛漸次謀籌膏火以規久遠遽以終養告歸旋丁憂服闋擢補鳳翔縣知縣遷同知未抵任免

洵陽縣志

薛中巖山東范縣人由舉人於乾隆二十四年授洵陽縣知縣清介絕俗不解迎合上官嚴明有威胥吏無所施其機變廳事西與典史署鄰聞有鞭扑聲必嚴詰之時大府閱兵道經洵邑中巖馭

下嚴凡郊迎供張諸事布署精嚴僕從無所施其技大府以此深器之嘗於班行中指目曰是洵陽某令耶投謁卽見之邑山藪盜竊多匿其中常有甲乙先後被盜二案中嚴盡得其魁寘之法故事獲盜者必押囚赴省成招中嚴故貧兩次裹糧拮据遂決意告歸矣去任日自署前祖道至江干擁擠不能行舟抵樊城無雇車之費因質衣覓輿以歸

洵陽縣志

嚴一青字選亭浙江烏程縣人由舉人保知縣乾隆五十六年授陝西白河縣到任即訪求邑乘得稿本毅然以爲己任嘉慶元年教匪倡亂陷湖北竹山將逼近白河一青率鄉勇禦之羊兒溝殺賊甚衆謂城小難守築外城十四里名曰大寨遇警卽入寨固守三年賊陷鄖西鄖西距白河若干里一青督沿江設卡收舟艦使賊不得渡旋禦賊藩溝又敗之奉文築堡增大寨四小寨十六聯

界牆爲三道邑賴以全創設義倉捐穀千石爲倡寨倉以給團勇城倉以給難民鄉置義田有事備防堵事平即藉爲義學之資陝撫台布稱其惻悌無華專心辦事爲通省冠擢新設五郎廳通判仍留白河久之以病去官仍以其暇纂成縣志若干卷東壩黃姓大吏疑爲教匪使誘而誅之一青力白獲免黃立嚴公祠祀之然論者則謂一青築城保境之功尤不可沒云

白河新志

賀雲鴻字梅坪直隸武強縣人乾隆四十九年以舉人任大荔縣知縣修城隍究水利聽斷明決輿論翕然時巡撫畢沅以文學節吏治檄州縣修志乘雲鴻乃本馬樸俞應辰之書正訛補闕纂大荔縣志二十六卷興利除弊之意時時見於序論遺愛在人數十年猶稱道未衰云

大荔縣志參同州府續志

王恭修安徽青陽縣人由廩貢議敘以縣丞分陝西嘉慶七年署

大荔縣事嚴治盜賊而寬愛良民德威並用民咸稱之有以一二錢細事訴於庭者亦笑而曲直之不爲怪試童子首拔張聯珠愛其文呼以小友聯珠後中丙子舉人老而談及猶泣下也署印數月去邑民脫其靴以志遺愛後又歷任涇陽渭南等縣亦有政聲

同州府志參
大荔縣志

楊大坦字廣亭甘肅高台縣人原籍浙江嘉慶間由貢生以知縣發陝西夙習吏治遇人亦坦易無城府初任南鄭縣知縣值甯陝兵變元戎駐郡城軍書旁午大坦供億無誤負債逾萬典衣啜粥不以絲毫累民屏絕苞苴每遇詞訟虛衷訊斷待人有恩誼捐銀四百兩廣漢南書院地基清各案入官田地爲諸生膏火資成前令班逢揚未竟堰工自麻柳灣至娘娘山七里上中下共三壩灌田七八千畝民甚德之甯陝鎮移置漢中大坦於新兵初至時待

以禮遇以誠兵弁敬服繕造衙署兵房均堅好卒之日兵民皆痛

哭爲之罷市大坦曾署乾州知州見乾州志稿

南鄭新志參
乾州志稿

李希曾字芋村漢軍正白旗人中道光壬午科進士發陝西初任
永壽縣知縣值新疆用兵朝廷調吉林軍西上沿途騷擾希曾親
往監軍鎮極力彈壓始克少安久之調涇陽升留壩廳調孝義廳
同知所至課農桑培文教興利剔弊除暴安良節用愛人捐廉勸
賑凡爲小民計者無不周且備也尋擢乾州直隸州知州創修劉
猛將軍廟一甄一木未嘗取民尋升西安府知府以終

孝義廳志
涇陽縣志

志乾州
志稿

熊兆麟字墨樵江西宜黃縣人由拔貢生中道光乙酉科舉人以
纂修國子監志金石門告成議敘用知縣授浙江富陽縣旋調蘭
谿秀水丁憂服闋以知縣發陝西初署洛川縣事補鳳翔縣知縣

調補大荔縣性剛果頗以威著呈詞先訊原告詐誣者輒被詰責不敢復訴治盜賊尤嚴既得贓即收禁匪徒斂跡二十六年大旱回民蠢蠢欲動畏兆麟不敢發卒賴以安兆麟又勸各村分賑出倉糧平糶喜論文邑舊無書院附府書院應課兆麟捐五百金爲倡復勸邑紳杜志銓出資創修馮翊書院以其餘息之爲師生修脯膏火之需由是科名頓盛四年獲雋者五人其他修城垣泮池纂邑志尤多可紀云

關中同官縣志參大荔縣志

龔衡齡字是尹一字任臣福建侯官縣人由例監生中道光壬辰舉人辛丑成進士以即用知縣分陝西二十二年署孝義同知持身清潔性復慈良在任首端士習履任未久而去士民誦之尋充甲辰科陝甘鄉試同考官精心校閱得士頗盛是年補興平知縣抵任後以城闌半就頽圯商諸紳富集縉錢一萬數千衡齡又復

捐廉助之以進士楊發枝總其事越十月而竣事垣墉堅實雉堞
魚鱗並增東西兩新壘觀者壯之及回亂屢攻縣城屹屹崇墉獨
資保障歲大飢衡齡藉城工代賑窮民賴以全活者無數初軍流
遣犯至縣輪派鄉間分管鄉人晝支飲食夜防逃竄渠輩又恣肆
索逼鄉民不勝其擾衡齡乃於治城購屋創流民所令署役管束
之其累遂除

興平新志參劉果敏
公批牘興平鄉土志

熊文瀾字春帆湖北松滋縣人以道光丁酉優貢考取知縣發陝
西歷署甘泉咸陽安康知縣皆有惠政咸豐初元口匪擾楚境安
康震恐文瀾先事設防民獲安堵七年邑大饑奸民藉災煽亂文
瀾擒治之發倉以賑患乃息次年復蝗時曾望顏撫陝厲行捕蝗
之令文瀾躬督農民步行烈日中竭力搜捕購買螻種俾無遺孽

民咸德之

湖北通志

楊玉章字潤之四川成都縣人道光乙酉科拔貢以知縣分陝西
咸豐四年署高陵縣知縣催科不擾而稅無逋負好獎勵士類課
必扁試飫以酒食卷必手閱未嘗假借學宮魁樓久圯移其座而
重建之汲汲於培植文風如此尋署醴泉縣事發奸摘伏人不能
欺補鄠縣移大荔擢商州直隸州知州卒於官玉章爲詩工長短
句善正隸諸書法亦蜀中知名士也

醴泉探訪冊
高陵縣志

張守基字稚雲河南祥符縣人父光第官安徽布政使守基以軍
功保知縣發陝西同治初年補米脂縣知縣時縣城頽圯出入如
履平地守基招集紳耆曰秦川回亂出沒無常縣城當榆綏要衝
今不預修築倘有風鶴之警奈何衆以欸絀工鉅皆有難色守基
曰勞怨僕自任之諸君子勿憂也乃邀集富商勸捐鉅款刻日興
工板築甫竣而回匪游騎已至無定河濱矣守基創辦團防城分

四團每團設團長二哨長六次什長次團丁次巡更礮手上下聯絡章程皆手訂各城團長皆以有學識品行者選充之且曰今日之事固當用武然必有血性有識見者臨事方有把握及回陷綏德進圍米脂守基督率紳民晝夜巡防梆鼓之聲自宵達旦賊環攻四十餘日無懈可乘會總兵文星明等督師至城圍遂解初回匪數十人據城對面之文屏山施放槍礮擊城東南隅守陴者皆懼守基屹立城隅不少動且徇於衆曰若輩無懼鎗子有眼不妄傷人也賊退即於文屏山上築寨與縣城相犄角由是城守益固守基好讀書喜飲酒寇至則督飭巡防所宵罔間寇退則邀集諸士紳樽酒論文終日不倦邑中人民皆倚如長城焉久之丁母憂瀕行爭設香案餞送至數十里外有攀轅泣下者回匪之亂陝北州縣多失守米脂獨保全守基力也邑人感其德祀之循良祠焉

陳西庚字星垣湖北蘄州人由廩生中同治壬戌科舉人乙丑成進士以即用知縣分陝西歷署汧陽渭南洋縣高陵醴泉補岐山縣知縣升授寧陝廳撫民同知所至有聲其署高陵也適值光緒丁戊大祲接辦賑恤力鑒前車弊絕風清頗有哀矜之意又創置義塚收掩餓殍其任醴泉也亦有善政至今地方紳耆尙多稱之

高陵縣志

宗丙壽字鼎岑湖北黃陂縣人中同治壬戌進士由部曹改官知縣十一年選米脂縣知縣城西無定河舊設木橋一兵燹被毀每屆秋冬水漲東西兩川居民莫不視爲畏途丙壽履任籌集巨款庀材鳩工俾橋梁仍復舊制民始無病涉之虞復倡捐錢三百千發商生息交公局董事經理訪邑中孤寒守節貧無依賴者酌給

養贍丙壽學問淹博好獎掖後進公暇招諸生終日講論遇有疑義親爲指授久而不倦性廉介不喜逢迎以忤上官意撤任邑人惋惜之離任日群送至綏德州保障門外有依依不捨之意焉

米脂

縣新志

徐德良字韻坡江西龍南縣人由副貢生用知縣發陝西有幹才精吏事善松雪書法片紙隻字人爭寶之長於聽斷性剛果敢爲同治三年署高陵縣事力以除暴安良爲務縣有異端教恃其強富橫行爲害有訟事輒與官抗悍然無忌畏德良扑之曰汝非朝廷赤子乎固吾治下也痛懲以法自是始斂迹焉五渠堙涸有年德良慨然令渠傍住戶農隙各自修濬又以縣去水源遠上流往往擁而專之積重難返於交界處所購地另開新池瀦涇水露宿渠上躬自督治無如涇低渠仰迄無成功然志在利民民實懷之

當治渠時適學使過境德良食以蔬食曰敝邑彈丸區甫經兵燹民力不支此不腆乃割俸所爲且縣無驛站卽盤飧亦非下官分所供也其守正不阿多類此尋任醴泉縣知縣有政聲至今紳民

頌之

高陵縣志

孫維字少蘭浙江山陰縣人由監生以知縣發陝西同治三年署洵陽知縣洞知利弊先是口逆破興安洵邑戒嚴城外寺廟民房多遭焚燬維於亂後重修文廟文昌廟敷文書院及明倫堂復建臨崖寺皆捐廉俸爲之倡郡城總局派索團練費八千金維以洵民瘡痍初復稟大憲免之又創設養濟院恤孤貧尋卒於官

洵陽縣志

馬毓華字蓁斐江蘇上元縣人咸豐八年以知縣發陝補用歷署鎮安臨潼定邊咸陽鳳翔蒲城咸寧藍田郃陽等縣前後四十餘載人稱老吏同治間補紫陽調咸陽擢寧羗州知州其任定邊也

將軍都興阿以毓華保守認真民情愛戴保以直隸州知州用其任鳳翔也值回匪糾衆圍城登陴固守圍解以知府升用其任寧羌也幾三十年州西南及東北一帶城牆崩圯城樓亦多頽毀毓華勸捐重修並添建四城角房用資守望復倡捐資興費一千五百兩三年中可得息銀三百五十兩以濟諸生應試之需補葺試院續建倉廩善政推行輿論允洽光緒末病卒著有詩文集若干

卷子長豐中光緒己丑順天舉人直隸候補知縣

寧志參
關中
州官
錄

鄭思敬字惺吾一字執安四川新都縣人原籍湖北麻城幼嗜學

工書咸豐辛酉考取優貢生中同治庚午科舉人由內閣中書改捐知州發陝補用光緒六年委署葭州知州旋補耀州有惠政調華州性仁慈無官氣蒞州後接紳民以誠懇於聽事堂置木梆一日出時擊梆衙署內外均起辦公擬捐廉五百金新聖廟延紳議

決適有他務未獲施行疾惡綦嚴有齊姓者被匪搶劫飭役嚴捕立獲五人梟首警衆執法如山世族關說初不爲動題二堂楹聯有柔不茹剛不吐之說尤善行草屢充陝西鄉試同考官前陝撫鹿傳霖最器思敬保薦卓異擢署首縣在華州日飛蝗爲災不入華境優待士子重給膏獎舉賓興禮常召諸生入署面試課以經古雜作訓之曰孔孟程朱爲古今正學勿入歧途自以爲古鄭苗裔備禮祭周鄭桓公墓是年九月卒於官隱歸時華人有含淚掛紙焚錢送出境者刊有制義叢說陝闡分校錄科場異聞錄分給肄業諸生子四寶琛光緒丙戌進士刑部主事寶森附貢生候選詹事府主簿寶焜候選從九品寶鑒

華州採訪冊參
關中同官錄

羅驤字誠之一字龍伯四川丹稜縣人由增生辦團練保訓導調營以功擢知縣同知以知府用歷署陝西鳳翔長安寧羗等州縣

題補褒城所至之處恒思以禮教齊民著有易俗條約一卷光緒二年署南鄭縣事邑有中梁書院舊附於漢南書院中驤抵任後特爲籌款創修天臺書院於華廟坊規模宏整又建龍神祠於萬壽壩因勢築堰以廣水利人號羅公堰至今利賴後以吏議去邑人惜之於其卒也祀諸天臺書院焉

南鄭縣新志

陳潤燦字昆石山東寧陽縣人光緒丁丑進士以卽用知縣分陝西歷膺繁要六年署朝邑縣事政平訟理閭閻安堵初縣北麻家坡有農家張廷勤者夜自外歸中途爲其弟廷儉與傭工陳撓兒狙擊殞命蓋以分爨挾怨之故翌日覓獲廷勤屍其弟佯哭之且訴於官數年沈冤莫雪忽一日傭者陳撓兒馳書索負爲其嫂偵知報於官潤燦乃蒸骨檢屍始得其情置廷儉及撓兒於法奇冤以白老幼稱快至今邑人咸道潤燦之明且斷也潤燦久宦不遷

光緒末年以病歸卒於家

朝邑採訪冊採

張榮升字蘭亭安徽壽州人以監生投效軍營保知縣分陝西屢權劇邑所至有聲光緒八年七月任蒲城縣爲人剛毅知兵膽識過人抑強扶弱訟師棍徒靡不畏避濬漫泉河以溉民田建忠烈坊與忠義祠旌士女殉回捻之難者祀之蒲邑舊無試院榮升捐廉創修甘回告警飭紳士葺城隍備器械聲色不動省費幾萬金民卒安堵三握蒲篆以卓異薦擢寧陝廳同知尋卒於官子紹彩亦仕陝歷任牧令

蒲城縣志參採訪冊及關中官錄

徐普字仲山江蘇江甯縣人少習說文服膺段玉裁王引之頗留心於漢學光緒壬午由監生中順天鄉試舉人考取覺羅官學教習期滿引見以知縣發陝西試用時密縣張汝梅以布政使護陝西巡撫一見器其才即邀入幕府俾主機宜文字旋司權漢中收